

皇清經解續編卷六百三十二

南菁書院

國語發正五

錢唐汪遠孫小米著

魯語下

肆夏樊遏渠解肆夏一名樊韶夏一名遏納夏一名渠此三夏曲也

內傳襄四年杜預注與韋解同劉炫規之云杜爲此解頗允三夏之名而分字配篇不甚愜當何則文王之三卽文王是其一大明綏是其二鹿鳴之三則鹿鳴是其一四牡皇皇者華是其二然則肆夏之三亦當肆夏是其一樊遏渠是其二安得復以樊爲肆夏之別名也若樊卽是肆夏何須重舉二名呂叔玉解國語以肆夏爲時邁樊遏爲執競渠爲思文

以周頌三詩爲三夏樊遏連文或是相傳古義

懷和爲每懷

上懷字依公序本增

解後鄭司農云和當爲私

穆子以懷和釋每懷詩皇皇者華首章傳每雖懷和也卒章傳雖有中和當自謂無所及正本外傳王肅述之云雖內懷中和之道猶自以無所及孫毓亦以毛傳上下自相申成

並見

詩

疏懷和爲六德之一若懷私豈可謂之德乎

咨才爲詆解才當爲事傳曰咨事爲詆

內傳作咨事外傳作咨才本不相襲不必破從內傳武進臧氏琳經義襍記曰咨才爲詆者謂咨賢才之謀也咨詢爲親戚之謀咨詆爲賢才之謀合親賢之謀而謀無不周矣臧說最直捷孔晁國語注云材謂政幹也亦不改字

咨事爲謀解事當爲難傳曰咨難爲謀

毛詩傳云咨事之難易爲謀合內外傳爲訓也此亦不必改字內傳咨難爲謀當讀爲難易之難說文慮難爲謀同杜氏以患難解之誤矣補音爲難乃旦反誤亦同杜

重之以六德解六德謂諏也謀也度也詢也咨也周也

遠孫案上文臣聞之曰懷和爲每懷咨才爲諏咨事爲謀咨義爲度咨親爲詢忠信爲周六語卽六德與內傳五善傳文均極明白毛詩皇皇者華二章傳云忠信爲周訪問於善爲咨咨事爲諏三章傳云咨事之難易爲謀

陳奐曰易字當衍

四章傳

云咨禮義所宜爲度卒章傳云親戚之謀爲詢兼此五者雖有中和當自謂無所及成於六德也正本內外傳爲說箋疏

申毛亦同惟以中和爲周之訓恐未得傳意耳孔晁國語注
既有五善又自謂無及成爲六德義亦同毛忠信爲周言咨
於忠信之人卽內傳之訪問於善爲咨善卽忠信也自忠信
之人言之曰周自訪問之人言之曰咨聿旣從鄭破上文和
字爲私遂分咨與周爲二以合六德之數誤矣詩疏謂周者
彼賢之質不當以周備數意雖是而言猶未盡也

季武子爲三軍解周禮天子六軍諸侯大國三軍魯伯禽之封
舊有三軍其後削弱二軍而已

魯頌閟宮公徒三萬箋云萬二千五百人爲軍大國三軍合
三萬七千五百人言三萬者舉成數也疏引鄭答臨頌云魯
頌公徒言三萬是二軍之大數又以此爲三軍者以周公受

七百里之封明知當時從上公之制備三軍之數 外王父

錢唐梁氏諱履繩曰書費誓魯人三郊三遂是舊有三軍之

證

左通補釋

天子作師解師謂六軍之眾也

詩棫樸疏鄭荅臨碩云春秋之兵雖累萬之眾皆稱師詩之六師謂六軍之師又引易師卦注云多以軍爲名次以師爲名少以旅爲名

公帥之以征不德解公謂諸侯爲王卿士者也周禮將軍皆命卿詩云周公東征周公時爲二伯而東征則亦上公爲元帥也公羊傳僖四年古者周公東征則西國怨西征則東國怨荀子王制篇周公南征而北國怨曰何獨不來也東征而西國

怨曰何獨後我也又白虎通義巡守篇引傳曰周公入爲三公出爲二伯中分天下出黜陟詩曰周公東征四國是皇言東征述職周公黜陟而天下皆正也此韋解所本

自伯子男有大夫無卿解無卿無命卿也王制曰小國二卿皆命於其君也

禮記王制鄭注云小國亦三卿此文似誤脫耳白虎通義封公侯篇引王度記亦曰子男三卿

召舟虞解舟虞掌舟

說文緬禁苑也引春秋傳曰澤之自緬或作𩚑段注云自當作舟昭二十左傳曰澤之萑蒲舟鮫守之鮫當是𩚑誤許所據竟作舟緬耳魯語有舟虞同也

夫苦匏不材於人共濟而已解其濟而已佩匏可以渡水也
淮南說林訓嘗抱壺而度水者抱而蒙火可謂不知類矣鵠
冠子學問篇賤生於無所用中流失船一壺千金案壺卽匏
也其性浮得之可以免沈溺故當失船之時其直千金也此
亦如天竺涉水帶浮囊之類

聞畏而往聞喪而還

畏讀爲威上文爲其名與其眾也說苑正諫篇作爲其威也
名與眾卽所謂威也畏威古字通

榮成伯解成伯魯大夫聲伯之子也名樂

內傳襄二十八年杜注榮成伯榮駕鷺

駕或作鷺非

潛夫論志氏

姓云榮氏魯公族蕭山汪氏繼培箋引世族譜曰叔肝曾孫

案禮記檀弓疏引世本叔肝生聲伯嬰齊据韋解榮成伯乃叔肝之孫矣

追而予之璽書解璽印也古者大夫之印亦稱璽璽書印封書也

應劭漢官儀曰封太山以金泥銀澠印之以璽璽施也信也古者尊卑共之月令曰固封璽春秋傳璽書追而予之是也秦漢以來尊者以爲名乃使避衛宏漢舊儀曰秦已前民皆以金銀銅犀象爲方寸璽各服所好漢以來天子獨稱璽又以玉羣臣莫敢用也

元和惠氏棟左傳補注四

跼蹐畢行解跼蹐蹉蹉也

方言倚跼奇也自關而西秦晉之間凡全物而體不具謂之

倚梁楚之間謂之踦說文踦一足也莊子德充符闔跂支離

無脰司馬彪注云闔曲跂企也闔跂支離言腳常曲行體不

正卷縮也跂舊音引賈本作跛布我反跂跛形相近

大戴禮保傳周

后妃任成王于身立而不跛舊注跛一作跛說文無跂字

掎止晏萊焉解從後曰掎止獲也

說文掎徧引也內傳襄十三年譬如捕鹿晉人角之諸戎掎之杜注掎其足也後漢書馬融傳注引說文曰掎徧引一足

也今本無一足二字韋注本賈

季桓子穿井獲如土缶

如字當衍

其中有羊焉解或云得土如瓦缶

狀中有土羊昭謂羊生羊也故謂之怪

依公序本

漢書五行志中魯定公時季桓子穿井得土缶中得蟲若羊

近羊禍也羊者地上之物幽於土中象定公不用孔子而聽季氏暗昧不明之應也一曰羊去野外而拘土缶者象魯君失其所而拘於季氏季氏亦將拘於家臣也

使問之仲尼曰吾甯井而獲狗何也解獲羊而言狗者以孔子博物測之也

時人不識獲羊故以獲狗爲問韋解非

木石之怪曰夔蜺蜺解或云夔一足越人謂之山繅蜺蜺山精辟綜東京賦注夔木石之怪如龍有角鱗甲光如日月見則其邑大旱孟康漢書揚雄傳注夔如龍有角人面司馬彪莊子達生注云夔狀如鼓而一足夔一名畢方淮南子汜論訓木生畢方高誘注云畢方木之精也狀如鳥青色赤腳一足

不食五穀文選東京賦辭綜注云畢方老父神如鳥一足兩翼常銜火在人家作怪災西山經章莪之山有鳥焉其狀如鶴一足赤文青質而白喙名曰畢方藝文類聚木部引尸子云木之精氣爲必方又法苑珠林審察篇引白澤圖云火之精名曰必方狀如鳥一足以其名呼之則去又云上有山林下有川泉地理之閒生精名曰必方狀如鳥長尾必與畢通說文引淮南王說螭蝮狀如三歲小兒赤黑色赤目長耳美髮

水之怪曰龍罔象解或云罔象食人一名沐腫

公序本

淮南子水生罔象高注云罔象水之精也法苑珠林六道篇引夏鼎志云罔象如三歲兒赤目黑色大耳長臂赤爪索縛

則可得食

陳奐曰奐聞諸先君子云海船居洋中有人曾見此怪持柁甚力船不得行用巨斧擘其手臂而去

不害人形

狀正如此

上之怪曰羴羊解唐云羴羊雌雄未成者

未作不誤

淮南子井生墳羊高注云墳羊土之精也墳與羴通

季康子問於公父文伯之母解康子魯政卿季悼子曾孫

依公序

桓子之子季孫肥也文伯魯大夫季悼子之孫公父穆伯之子公父歟也母穆伯之妻敬姜也

鄭注檀弓下云敬姜者康子從祖母疏引世本悼子紇生平

子意如意如生桓子斯斯生康子肥世本又云悼子紇生穆

伯靖靖與意如是親兄弟意如是康子祖穆伯是康子祖之

兄弟敬姜氏穆伯之妻故云康子從祖母也下注云祖父昆

弟之妻亦据世本

鼈於何有解於何有猶何禮有鼈也

棲霞牟氏房曰於何有言非難得之物不足吝惜也內傳僖九年土於何有哀二十六年國於何有句意正同

康子在其朝解自其外朝也

遠孫案注中外字當作內字下文自卿以下合官職於外朝合家事於內朝韋注云外朝君之公朝也內朝家朝也家朝猶私朝康子在其朝爲私朝不爲公朝注云自其內朝卽從下文作說續溪胡氏培暈曰韋注外字當是家字之誤鄭注玉藻云私朝自大夫家之朝也此云自其家朝也卽用鄭注若作外字則與上自其二字語意不合矣胡說亦通

天子及諸侯合民事於外朝合神事於內朝解言與百官考合民事於外朝也神事祭祀也內朝在路門內也

陳氏奐曰天子諸侯皆二朝周禮宰夫掌治朝小司寇朝士掌外朝其言朝位同此外朝卽治朝也司士正朝儀之位大僕前王入內朝皆退大僕王眡燕朝則正位此內朝卽燕朝也槁人云掌其外內朝宥食者之食然則天子朝唯有外內二而已禮記文王世子其朝於公內朝則東面北上臣有貴者以齒其在外朝則以官司士爲之公族朝於內朝內親也雖有貴者以齒明父子也外朝以官體異姓也又宣六年公羊傳靈公爲無道使諸大夫皆內朝趙盾已朝而出與諸大夫立於朝何注云從內朝出立於外朝蓋外朝有諸大夫位

焉從內朝出立外朝卽從燕朝而出俟治朝也然則諸侯朝亦唯外內二而已鄭司農朝士注云外朝在路門外內朝在路門內仲師說門朝之制確不可易

毛氏傳檜
羔裘疏

陳氏奐又曰劉向別錄社稷宗廟在路寢之西又云左明堂辟離右宗廟社稷何休注桓二年公羊傳云質家左宗廟上親親文家右社稷尙尊尊然則劉子政所言蓋殷制也殷宗廟在路寢之西周宗廟在路寢之東則宗廟在路門內路寢之左此其義證故魯語云合神事於內朝是也

闕宮
疏

沃土之民不材淫也瘠土之民莫不嚮義勞也

淫當爲逸涉上文兩淫字而誤內傳成六年襄二十五年疏引皆作逸文選張平子西京賦處沃土則逸處瘠土則勞淮

南脩務訓夫瘠地之民多有心者勞也沃土之民多不才者
饒也高誘注心向義之心也饒逸也張高皆用外傳而字並
作逸尤其明證矣列女傳及文選注作淫後人据誤本外傳
改

天子大采朝日解禮天子以春分朝日示有尊也

書堯典寅賓出日鄭注謂春分朝日大戴禮保傳篇三代之
禮天子春朝朝日盧辯注云祭日東壇管子輕重已篇以冬
日至始數四十六日冬盡而春始天子東出其國四十六里
而壇祭日犧牲以魚

少采夕月解夕月以秋分

書寅餞納日注謂秋分夕月大戴禮秋暮夕月注云祭月西

坎管子以夏日至始數九十二日謂之秋至天子西出其國
百三十八里而壇祭月犧牲以彘
與大史司載糾虔天刑解載天文也司天文謂馮相保章氏與
大史相儷偶也

禮記月令乃命大史守典奉法司天日月星辰之行宿離不
貸鄭注云離讀如儷偶之儷宿離謂其屬馮相氏保章氏掌
天文者與宿偶當審候伺不得過差也

日入監九御解九御九嬪之官

九御卽九嬪周語內官不過九御韋解同此周制也周禮敘
官九嬪以下無三夫人王氏引之曰此與昏義不同昏義九
嬪次於三夫人之下此則有九嬪而無三夫人非有其人而